


ATA den reunion cu Formador Mike Eman

ATA tin un modelo solido cu a demostra di ta funciona



ORANJESTAD (AAN): Turismo a hunga un rol grandi den e recuperacion economico di pais Aruba. E cifranan di turismo den e ultimo 4 añanan ta na agrado di henter e sector turistico y particularmente di Aruba Hotel & Tourism Association. James Hepple a expresa esaki algun dia atras durante di un reunion cu formador Mike Eman.

E desaroyonan positivo aki ta danki na e esfuersonan pa Aruba keda semper un paso dilanti di e competencia den e sector turistico y e disponibilidad di fondonan pa por eherce e trabou aki efectivamente. E disponibilidad di fondonan pa haci e trabounan aki ta danki na e cambionan

recien caminda a institui Aruba Tourism Authority Sui Generis. Esaki ta un cambio cu a haya sosten y a cuminsa bou di Gabinete Mike Eman, caminda cu presupuesto pa promove Aruba ta bou di maneho di e mesun ATA.

ATA tabata invita pa sinta cu formador Eman y su team na inicio di e siman aki. E delegacion di ATA a wordo presidi pa directora Ronella Tjin Asjoe-Croes, kende a haya e reunion uno hopi interesante unda a haya chens pa dialoga riba diferente aspecto cu ta importante pa Aruba Tourism Authority y Turismo di Aruba en general.

Tema di e reunionnan

semper ta cuminsa cu splicacion di e contenido di e carta cu Gobernador Refunjol a entrega na formador y e puntonan pa tene cuenta cu nan den formacion di su Gobierno. A intercambia di pensamento y despues ATA a duna un resumen di resultadonan cu e organisacion aki a logra den su casi 4 año di existencia. A presenta tambe con diferente indicador ta mustra cifranan hopi positivo.

ATA a trece dilanti tambe algun punto di atencion, specificamente pa loke ta e area di turismo y su desaroyo. Den cuadro di esaki a menciona cu for di momento cu a independisa ATA, cambiando ley, a crea un modelo solido cu ta un punto fuerte den e maneho di turismo. Esaki ta algo cu mester sigui cu ne, pasobra el a demostra di ta uno exitoso.

A pone formador Eman na altura di e Business Plan cu ta trahando riba dje pa e proximo tres añanan, cual ta wordo hinca den otro cu contribucion di stakeholdernan. Un di e puntonan cu lo enfoca hopi riba dje, cu ta cuadra cu pensamento di formador, ta e enfoke riba producto Aruba. Atrayendo mas bishitante cu ta gasta mas pero e producto Aruba mester mehora. Den esaki

ATA por hunga un rol, dunando su contribucion di loke por wordo mehora, basa riba loke e bishitantenan ta pensa.

“E balansa ey ta haci cu ATA ta bay tin un rol activo y pro-activo,” Tjin Asjoe a bisa. A pidi den cuadro di esaki mas capacidad den cantidad di asientonan. Pa loke ta mehoracion di producto Aruba, ATA ta aplaudi tur e desaroyonan cu a tuma luga riba tereno di infraestructura. “Nos ta spera cu esaki wordo maneha na un forma duradero pa Aruba conta cu un bon producto pa hopi año,” e directora di ATA a comenta. El a agrega cu mester tene cuenta cu e generacion di bishitantenan nobo, cu kisas tin otro necesidatnan cu e bishitantenan actual. Pa finalisa a pidi atencion pa combatimento di criminalidad.